

第二集

粵雅堂叢書

第二集

學雅堂藏書

奉

天

錄

奉天錄序

唐趙元一撰

緬尋太古之初真源一味自然樸畧不同浮華雖垂不
載至軒轅征蚩尤而廓清四海帝舜黜有苗而綏定萬
邦逮乎三王則弔人伐罪暴秦則兼并天下漢高夷兇
靜難光武討叛懲奸魏武破袁紹晉武滅苻堅宇文氏
破高歡普六茹平陳國太宗擒王竇肅宗定安史故曰
亂者理之源失者得之府法令施而逆子誅春秋書而
賊臣懼建中四祀朱泚作亂居我鳳巢忠臣義士身死

王事可得而言者咸悉載之使後來英傑貴風義而企慕乘危伺隙與時浮沈者其徒非一正史備書故不復贅錄志懷問鼎者不敢漏網錄失簡書直筆直言無矯無妄欲使朱藍各色清濁分流質而不文焉敢潤色恐史筆遺漏故備闕也李忠臣三朝名將忽爲叛主之臣洪經綸累代通儒乃作趨時之士其餘源休蔣鎮之輩敬忠日月之徒益屑屑者何足道哉每思南史之筆班馬之作莫不廢食仰歎且洪流壞堤猶可塞也烈火燎原尚可撲也逆臣賊子難可邇也睹此妖孽搖動中原

莫不痛心疾首是用書之簡素使好我者慕惡我者懼
元一代居關右世業三秦親睹櫓槍媼妍必記雖形闕
奉親而內懷其孝身乖事主而心荷聖恩每覽嵇紹紀
信之高義感千載而仰慕尋淖齒王敦之遺跡思奮劔
而誓心疾惡之志不忘寤寐起自建中四祀孟冬月上
旬三日涇原叛命終興元元年孟秋月中旬有八日皇
帝再復神都於中可否總紀其事也夫史官之筆才識
學也苟無三端難以措其手足元一不敏敢竊鳳皇之
一毛以効麒麟之千里獨學而無知孤陋而寡聞跡不

踐於邱門文有慙於先哲輕塵罕增於巨岳墜露無益
於廣川輒申螢燭之光將助太陽之照述而不作有愧
老彭冀革前非用警來祀云爾

重刻奉天錄序

秦敦夫先生在都中得奉天錄一冊於龍燮堂觀察云
出自徐星伯太史家者攜歸定爲四卷屬不佞校刊焉
謹按趙元一奉天錄四卷載於新唐書藝文志與徐岱
奉天記崔光庭德宗幸奉天錄等並列意當日獨流傳
非廣故司馬溫公撰通鑑考異引奉天記八條幸奉天
錄九條絕不引趙元一錄殆局內無此也然下逮南宋
陳振孫馬端臨皆著之於錄明楊士奇文淵閣書目尙
有唐奉天錄一部一冊在宙字號而近日則徐崔兩種

久佚趙錄亦絕無僅有矣錄中序文考以年紀或後先參錯恐未必全屬舊貫茲無所更定若字句轉寫之譌悉心讎正固十得八九疑弗能明者僅從闕如之義其事跡出於正史外頗多咸足資博覽而凡厥不同均可彼此互證閒有所失如朱滔自王號冀而此以爲燕嗣勝王湛然從元宗入蜀在天寶十五載而此以爲預建中是役盧杞貶新州司馬而此以爲夷州乃元一傳聞之未審者耳至於新唐書采渾瑊埋伏漠谷事入朱泚傳而云跳攻長安泚大驚踣榻前今觀此始知瑊抵朱

泚營壘謂奉天城下故與漠谷近非長安也采劉洽白
塔戰事入李希烈傳而云洽引還卒桓少清攬轡曰公
少不利遽北柰何洽不聽夜入宋州今觀此始知洽敗
後夜奔失路反嚮賊營少清意洽將死敵故控之使迴
當日問答尤詳不解宋子京何以皆誤加竄改如彼也
卽是而知其書之可以傳矣踰時告成畧舉所知願與
先生及世間深於史學者平議之道光三年歲在癸未
夏至後十日元和顧千里撰

粵雅堂叢書目

第二集

奉天錄四卷

唐趙元一撰

咸淳遺事二卷

宋無名氏撰

昭忠錄一卷

宋無名氏撰

月泉吟社一卷

宋吳渭編

谷音一卷

元杜本編

河汾諸老詩集八卷

元房祺編

揭文安公文粹二卷

元揭傒斯撰

玉筍集十卷

元張憲撰

潞水客談一卷

明徐貞明撰

陶庵夢憶八卷

明張岱撰

天香閣隨筆二卷集一卷

明李介撰

奉天錄卷一

唐趙元一撰

建中四祀先是襄陽節度使檢校右僕射梁崇義自阻
兵不朝二十年矣上在春宮情深憤惋及登寶位有誅
四兇之志焉詔劔南節度檢校工部尙書張延賞東川
節度御史大夫王邕梁洋節度御史大夫賈耽江陵節
度檢校工部尙書張伯儀淮揚節度司徒陳少遊淮寧
節度同平章事漢南漢北招討使李希烈充都統諸軍
平襄大總管王命頒行分路齊進獸奮龍驤謀臣盈幕

武族雲萃旗鼓纔施兇徒瓦解乘勝逐北如巨海之沃
熒光漢水浮屍似秋風之吹落葉崇義之首懸於朝矣
世祖昆陽謝安淝水各一時也詩云無拳無勇職爲亂
階斯之謂矣

都統李希烈自謂有尅敵之功名居然有都襄之志有
詔勒歸本鎮二字缺然生不諛之心乃劫其郡席卷而歸淮

寧凡掠良家子姓悉爲賤隸六畜資財掃地而盡昔太
武瓜步迴師六州無雞犬之響遊子望舍不識舊廬元
兇之拔襄陽甚於斯酷遂縱師陷我汝州河南尹鄭叔

則表奏之上命工部尙書兼右僕射哥舒曜總禁兵五萬而討之師謀士銳所向莫敢有爭衡者長驅築壘於襄城縣焉

時國家多故河北幽冀蝟毛蜂起三輔兩畿徵兵日繼皇赫斯怒爰整其族詔河陽節度御史大夫李芑太原節度檢校工部尙書馬燧澤潞節度檢校工部尙書李抱真朔方節度太子少師李懷光神策制將御史大夫異姓王李公晟華原鎮遏使御史大夫趙令珍分路長驅深入賊境雖王師頻勝而寇亦未衰勝負相參殺傷

萬計時軍用旣多不遑遠畧戶部侍郎趙贊上封事請
稅三輔兩畿居宇閒架及取兩市富商大賈於西明慈
恩二寺置院檢納貪吏深文怨及社稷太史奏曰審門
出天子有詔去城七里內諸審盡廢之及泚稱兵乃是
涇原節度姚令言爲謀主也

時哥舒曜孤軍無援糧儲不繼賊得其便重圍數周甲
士日唯半菽馬淘牆皮而藹焉潛表請濟師詔神策制
將行營兵馬使御史大夫劉德信御史大夫高秉哲各
馬步共一十萬來救襄城勅大梁節度司徒李公勉發

師犄角而攻之嘗軍書往來同會於汝州之薛店軍令

號

不嚴爲伏兵所敗三將之師望旗大潰戎器委數百里
鐵馬一萬蹄沒焉洛陽士庶惶駭北走河陽西奔崤
東都尹鄭叔則入保西苑唐漢臣奔於大梁高秉哲劉
德信收離集散駐軍於汝州

詔涇原節度姚令言赴援總師五千東至澧水時京兆
尹王翊屬吏置頓牛酒儉薄將士色厲遂傳箭而迴十
月三日巳時也

令言尙在紫宸殿授以樞密并賜資金帛時御史臺左